

operatione entis nomen in eodem sensu convenire non potest diversis entibus, ac proinde non est univocum. Hinc patet controversiam illam, quam nimis serio agitant aliqui, meram esse logomachiam, seu totam in nomine positam. Majoris utilitatis est sequens conclusio.

CONCLUSIO.

Essentia rerum & attributa sunt absolute necessaria, immutabilia & æterna, modi vero sunt hypothetice tantum necessarii, mutabiles & non æterni.

Prob. 1 pars. Essentia est id, quod primum in ente concipitur & sine quo ens existere non potest; sed primum illud attributum, quod primum in ente concipitur, absolute & in seipso consideratur, ergo essentiæ rerum sunt absolute necessaria. Porro attributa fluunt ex ipsa essentia; ergo posita essentia, necessario, & absolute ponuntur attributa, ac proinde & attributa sunt absolute necessaria: Sed quæ sunt absolute necessaria ea sunt immutabilia, ergo essentiæ rerum, & attributa sunt immutabilia; quæ autem sunt immutabilia, & absolute necessaria, ea perpetuo fuere in intellectu divino: Deus autem est æternus, ergo essentiæ rerum, & attributa absolute necessaria & immutabilia ab æterno fuerunt in intellectu divino, ac proinde essentiæ rerum, & attributa sunt absolute necessaria, immutabilia & æterna.

Prob. 2 pars. Ideo modi actu existunt
in